

Communicaziun allas medias

Tinizong, 10 da settember 2024

«Plan strategic bike Surses» - Amprema badigleida dalla construcziun digl trail da Parnoz

An process participativ cun la populaziun, ò igl cumegn da Surses elaboro igl «Plan strategic bike Surses» tgi serva scu basa strategica per sviluppar la purscheida da mountainbike an Surses. Scu maseira prioritaria è preveida la construcziun d'en nov biketrail per mountainbikers principants, avanzos e famiglias davent da Parnoz a Savognin. Chest'emda ò gia li l'amprema badigleida dalla construcziun digl trail a Savognin.

Igl trail da Parnoz sera ena largia ainten la purscheida existenta e pussibilescha a principants ed a famiglias la midada digl eir cun bike sen veias da gôt ve sen en trail pi lev. Chel trail vign ad esser construa uscheia, tgi er mountainbikers versos vignan ad aveir lour plascheir da passar digl trail da Parnoz oragiu.

Planiso è en flowtrail simpel cun antschatta sur Parnoz e final a Son Martegn. Igl trail da Parnoz surmonta radond 200 meters d'otezza sen ena lunghezza da bung 1.7 kilometers. Igl trail da Parnoz ins so contanscher cun eir cun la pendiculara anfignen Tigignas e da lò sen ena veia agricola, u ord atgna forza sur diversas rutas da bike signalisadas sen veias da prada e gôt. Igl return alla staziun da val dallas Pendicularas da Savognin succeda sur la ruta da bike gio existenta. L'avertura digl trail da Parnoz è planisada per l'antschatta dalla staschung da stad 2025.

Ulteriours trails an planisaziun

Ultra dalla construcziun digl trail da Parnoz, è er la construcziun digl trail digl Gelgia gio an planisaziun. Chella ruta da bike e viandar magna da Beiva sur igl Pass digl Gelgia anfignen Silvaplana. Per saveir realisar tala, duess la ruta naziunala nr. 1 da SchweizMobil existenta, neir dislocada digl Pass digl Set ve sur igl Pass digl Gelgia. Antras igl project duessan neir colleidas dus regions turisticas cun ena ruta directa da bike e da viandar. La construcziun da chel trail, è planisada per igls onns 2025 e 2026. La finiziun digl plan strategic consista dalla construcziun digl trail da Somtgant. Cò sa tractigl den flowtrail tranter Somtgant e Tigignas.



Chel trail è chinto per famiglias e velocipedists e velocipedistas da tot igls nivels scu supplemant digl trail da Parnoz ed augmainta ultra da chegl l'attractivitat dalla purscheida da stad.

Igl plan strategic bike aint igl context general turistic

Igl plan strategic serva scu instrumaint da labour fundo per la realisaziun ed igl svilup dalla purscheida da bike. Aint igl focus stat en svilup cuzzevel e favorevel scu er l'optimaziun dalla vasta reit da veias existenta an Surses.

La purscheida da bike serva ad ena miglra utilisaziun sur igl antier onn, sustigna l'etabilisaziun scu destinaziun turistica er igl aton e promova la cuntantientscha dad indigens e giasts.

www.valsurses.ch/bike

Persunga da contact per ulteriouras infurmaziuns (betg publitgier)

– Stefan Steiner, manader svilup digl li, tel. 081 659 11 94 u 079 777 19 23

Agiunta

– Foto (construcziun digl trail da Parnoz, da sanester a dretg: Daniel Wasescha, mastral, Gerry Cusini, capoluvrant, Irene Kolb, suprastanza communal, Lukas Häusler, manader da Project Allegra, Laura Regli, accumpognamaint ecologic, Stefan Steiner, manader svilup digl li)

10-09-2024 / sf

2'811 Zeichen